



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

**Name of School** : CARMEL BUNNAN TONG MEMORIAL SECONDARY SCHOOL

**學校名稱** : 迦密唐賓南紀念中學

**Name of Play 劇名** : 雕 玉

**Script writer 劇作者** : 張柏賢老師

**Synopsis 故事大綱 :**

文希大學畢業後一直無所事事，某晚她發現鄰居梁婆婆的詭異行為，而當晚梁婆婆發生意外，送院時囑託把一件物件交給孫兒阿博。文希和阿博兩位多年不見的朋友，穿梭城市的不同場所尋找線索，盼望能解開梁婆婆留下的謎團……



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

**第一場**

音效： Opening Music

場景： 深夜學校走廊

音效： 爆炸聲及玻璃碎裂聲

闖關者 A： 小心呀！

闖關者 B： 啱啱爆炸 o 既係生物室！你哋睇吓四樓好大煙。

闖關者 C： 睇黎 Miss Chan 同允行、思賢都玩完喇。

闖關者 A： 思賢……

闖關者 C： 時間無多，仲有幾塊砌圖唔知响邊……

音效： 炸彈倒數

恐怖份子： 各位玩家，一齊完成幅砌圖就可以過關。仲有 15 分鐘，學校入面 o 既炸彈將會全部爆炸。

闖關者 A： 快啲上去睇吓 Miss Chan 佢哋點，行啦！

闖關者 B： 放手啊！攞唔掂幅砌圖過唔到關就無命，我唔想陪葬。

闖關者 C： 呢一關 o 既牌係九筒……筒子係考驗團隊精神！我哋要一齊去生物室！

音效： 爆炸聲

音樂： 「今際之國的闖關者」 opening credit

**第二場**

場景： 晚間睡房

燈光： 開燈

妹妹： 家姐家姐，今集咁快做完，一心係咪都炸死咗？

文希： 主角點會有事。

妹妹： 過咗呢關，有埋九個圓圈嗰隻牌，佢哋爭隻東咋！

文希： 唔係叫做九個圓圈，係叫九筒。

妹妹： 沉迷賭博，有如倒錢落海呀。儲齊咩嘢十三麼，啲學生就返到現實世界……

文希： 係十三「么」！有無文化架你曾文恩？

妹妹： 曾文希，乜大學又教到你咁爛賭咩！

文希： 我呢啲叫熟悉社會文化，你唔好唔記得家姐大學讀邊科！麻雀大概响清朝發明，不過好多人比電視劇影響，以為麻雀係由馬吊演變而成……

音效： 麻雀聲



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

- 文希： 隔離屋梁婆婆呢排做乜日日開枱？
- 妹妹： 嘈冤巴閉真係好煩囉！
- 音效： 打電話聲
- 妹妹： 11 點 03 分喇！打落管理處啱啱好。
- 文希： 你唔係連梁婆婆都篤灰呀？細個樓上樓下日日都有人打牌架啦，梁婆婆以前成日請我哋食家鄉小食，你真係無啲人情味。
- 妹妹： 你講咩話？一定係呢排聽得太多 BTS，職業性失聰！
- 文希： 仲失憶添，頭先食飯啲碗你都仲未洗。
- 妹妹： 打邊爐咪好囉，一鑊熟碟都洗少幾隻……
- 文希： 我先唔要一年四季都烱吓烱吓！香港飲食同娛樂文化就係比你呢啲攞人攞彎晒。
- 妹妹： 懶得過嗰啲人畢業幾個月都唔去搵工，哎咁咁香港經濟比邊個攞彎呢？
- 文希： 咁搏命搵工都無意思，幾努力都唔會改變到經濟環境，哎，大學生喎。
- 音效： 麻雀聲
- 妹妹： 講落好耐無見過梁婆婆，以前都見佢棟住支拐杖落街晨運。
- 文希： 細個去梁婆婆屋企玩，佢成屋都擺滿書……
- 妹妹： 家姐你過黎窗邊睇吓！你……你睇吓……
- 文希： 做乜偷窺梁婆婆屋企？……點解……梁婆婆會一個人自己响度打牌架？
- 妹妹： 應該唔係同朋友 zoom 打牌囉……仲有你睇吓梁婆婆件衫，咁似啲古裝劇……
- 文希： 我喺中史書見過……係清裝呀！
- 梁婆婆： 你哋都打咗三隻喇，唔爭在啦，西！
- 姐、妹： 四人歸西？[尖叫]
- 音樂： 恐怖音樂

**第三場**

- 場景： 早晨的飯廳
- 音效： 早晨聲音
- 媽媽： 爛訓妹，好起身刷牙食早餐。
- 妹妹： [打呵欠]
- 文希： 我唔等你喇。阿媽醫院尋晚好多嘢做咩？咁晏返黎仲整早餐？
- 媽媽： 你兩個尋晚咁乖一早上床呀？
- 文希： 煲住劇繡好咗兩個吊飾比個客，眼劫咪早瞓囉。
- 媽媽： 宜家咁多人响 IG 睇吓相就比錢買貨架喇？咁多人欣賞，你就唔好hea 吓 hea 吓，認真做好佢。



**IMPORTANT NOTE 重要告示:**

This script is only for reference purpose. Rights for performance or adaptation is protected by copyright and their permission must be sought from the author.

以下劇本只作參考用途，如欲採用或改編，須先取得作者同意。

- 文希： 我都係無聊玩吓啫，日本有個微型刺繡大師，連 Chanel 都邀請佢展覽件 3D 拉麵微刺繡，人哋就真係技驚四座！
- 妹妹： 我話媽咪 o 既早餐先係技驚四座，啲煙肉幾香！
- 媽媽： 你哋兩隻懶馴豬，尋晚幾乎變晒燒肉。隔離梁婆婆煲乾水幾大煙呀，好彩保安巡樓發現……
- 文希： 梁婆婆無事吖嘛？
- 媽媽： 都仲未清醒，佢自己一個住，我响醫院收工返黎咪送番佢入去囉。
- 妹妹： 弊喇家姐，梁婆婆尋晚會唔會真係撞到啲啲嘢……
- 音效： 門鐘
- 妹妹： 日光日白搵到上門？家姐，唔駛驚，我手機有聖經 APP……
- 音效： 開門或鐵閘聲
- 媽媽： 入黎坐吓阿博！仲認唔認得梁婆婆個孫呀文希？你哋小學嗰陣成日一齊玩。
- 文希： 沙士博？
- 阿博： 好多年無見喇文希，你仲記得呢個花名。
- 文希： 你以前好鍾意飲沙士汽水吖嘛，我哋成班同學都咁叫你。
- 媽媽： 沙士係經典飲品，我就麻麻地浸味，反而有啲想飲返忌廉溝鮮奶同綠寶橙汁。
- 文希： 沙士博，好似四、五年班你就搬走咗，咁多年都無你消息，唔見你返黎探梁婆婆嘅？
- 媽媽： 阿博跟阿爸阿媽離開咗香港，尋晚梁婆婆入咗醫院，緊急聯絡先搵到佢，佢今日黎想搵你幫吓手。
- 阿博： 文希，auntie 話你大學讀文化研究，可唔可以幫我睇吓呢樣嘢？你有無諗到啲咩？
- 文希： 常見 o 既娛樂文化囉！有華人 o 既地方都有人打麻雀架啦。土地問題吖嘛，宜家香港已經少咗好多人打牌，納米樓點開枱吓……
- 妹妹： 我知呀！呢隻孔雀係叫一索，一心已經有呢隻牌！
- 媽媽： 咪站亂歌柄！梁婆婆入院嗰陣，手上面一直握住呢隻麻雀……
- 阿博： Auntie 話婆婆醒過一吓，千叮萬囑要將呢隻牌交比我，我諗一定有原因。
- 媽媽： 阿女你大學成日讀埋啲古怪嘢，畢業嗰陣連盆菜都研究過。你幫吓阿博，查吓梁婆婆留低隻牌有咩意思。
- 阿博： 唔該你吓文希，我驚呢次係婆婆最後同我講 o 既說話。
- 文希： 咁我哋試吓啦，你未食嘢假？我帶你去一個地方。